



焦太史編輯國朝獻徵錄卷之六十一目錄

都察院八

巡撫

韓文

王沂

徐源

韓鎬

林普長

張廉

洪漢

王珣

艾璞

周季麟

歐信

曹鳳

杜忠

徐節

冒政

曲銳

朱欽

安惟學

黃寶

陳鎬

李進

姜洪

賈錠

張淳

陳璧

高琬

陳璘

范鏞

沈林

伍符

孫燧

毛瑄

唐澤

陳九疇

潮

凌相

錢宏

陳祥

宋冕

戴書

陳克宅

宋滄

胡纘宗

胡宗明

張文魁

胡岳

焦太史編輯國朝獻徵錄卷之六十一

都察院八

巡撫

都察院右副都御史韓文傳

實錄

都察院右副都御史韓文字貫道直隸新城縣人天
順元年進士授行人司行人成化五年使琉球國歸
以所饋儀物獻之朝歷陞戶部員外郎郎中陝西右
叅議右叅政左右布政使至都察院右副都御史巡
撫寧夏尤畱心邊事有司方奉令捕豹上疏請止之
已而乞休致命給驛歸弘治十二年七月卒賜祭葬

如例文器宇宏濶以平易爲政未嘗肆苛猛立聲譽
但晚年以私憾發御史李興不法事幾陷興于死地
君子不能無議焉

都察院右副都御史王沂傳

實錄

王沂字希曾直隸武進縣人南京吏部尚書與之子
成化十一年進士授禮部主事歷陞員外郎郎中山
東右叅政湖廣右布政丁父憂服闋轉山東左布政
使弘治十四年陞右副都御史巡撫真定等府兼提
督紫荆三關累疏乞休不允以十七年十一月卒于
官年六十二計聞賜葬祭給驛歸其喪沂嚴毅謹恪
天性孝友在禮部時有外國以獅子來貢希重賞
有貢刀劍數至三萬者沂言夷人貪詐無厭量損甘
賜直且定數著爲例憲廟上賓凡山陵廟祧遷

之議儀文章創多所考據及巡撫時賦役繁重力爲
裁省滹沱河溢壞民田盧奏請築堤捍之功成賜綺
幣獎勞自處儉約家雖富無貴侈態居官二十餘年
始終一致人以爲有父風云

通議大夫都察院右副都御史徐公源墓志銘

土 鏊

正德乙亥正月二十九日都察院右副都御史徐公

卒于家訃聞 上命有司治葬事公諱源字仲山世

家吳長洲尹山之瓜涇祖孝質贈通議大夫都察院

右副都御史考諒初封工部都水主事贈武選郎中

加贈通議大夫都察院右副都御史公少好學工文

有名成化乙酉占南畿鄉薦乙未登進士第授工部

都水主事理徂徠等處泉源改兵部武庫司主事歷

職方員外郎武選郎中廣東布政司左叅政浙江右

布政湖廣左布政都察院右副都御史巡撫山東武
選最號劇司公至洗心自誓一意奉公權貴請囑戒
門者一切勿通而籍其姓名若將行罰者囑賄遂絕
時天下武功爵幾二十萬坐耗天下絕嗣者以疎遠
襲公奏宗派許襲傷支者一切罷之大革冗濫舊例
以罪亡者落職公謂罪有輕重以笞杖而革其職不
已甚乎人又樂其寬大司馬馬公甚委重之廣東勦
雲桂猺獞公督糧水陸並進觸瘴癘深入師以克濟
山東歲饑公與刑部何侍郎分行賑濟割臨清倉米
八萬有奇以補歲漕之數明年徵償公奏民賴拯給

稍蘇而又遽征之何殊弗給詔免與民涇王就封於
沂以水涸將由陸之國民爲騷動公檄所司姑緩之
亟發卒濬河水旋至坦然之國公私無擾公凡三蒞
場屋浙藩折卷多儒士御史意欲有所前却公曰科
場所取者文卽通榜儒士何傷山東斂銀將於鹿鳴
宴驢士公曰方筮仕而示以利非爲政之體乃已嘗
代祀岳鎮東海齋之夕應時澍雨闕里文廟成有白
金文綺之賜累疏乞致仕詔馳驛以歸公溫粹寬仁
人稱長者而臨事執守堅定雖當官蒞政未嘗一日
去書不觀文章博雅尤喜爲詩力去近世尖新之習

言有米家父子風

巡撫湖廣都察院右副都御史韓鎬傳 實錄

韓鎬字民瞻河南盧氏縣人成化十四年進士授給事中陞浙江右叅議屬浙大旱金衢爲甚有饑民奪富家食以自救姦盜乘之劫掠鄉村往來東陽義烏山中鎬聞之卽抵金華將赴義烏縣官謂不宜輕犯鎬曰吾計之熟矣彼倡爲饑民猶欲緩死若來犯我死無疑矣遂行夜遣人諭之曰汝饑民欲自救耳亦何罪吾來將賑之宜各散去否則剿殺之固不分饑民與盜也聞者相顧愕然比明悉遁去卽命各縣發粟賑濟且令鄉村嚴立保伍以相救護糾察由是數

郡肅然不復有警弘治八年陞本司左叅政寧紹溫
台四郡濱海歲輸粟數百石於沿海各倉而鄞縣糧
長相黨爲姦詐稱出洋遇風沉溺復議重徵積弊者
累年鎬至復有詐者鎬曰海神乏食耳何見奪之數
邪因廉得其實衆皆驚服十二年陞本司右布政使
海鹽濱海塘岍崩塌數千丈衆議塞之計費不貲以
民貧無所於辦鎬曰此事屬某當不煩官民而可成
蓋塘雖決舊石皆在又今年海鹽糧長當追餘價數
千兩行令每銀若干兩修塘一丈當衝之田亦令若
千頃修塘一丈糧長憚于出銀誠得修築則米穀雜
貨皆可僱役况舊石之外增添不多半歲可塞也乃
以屬鎬不三月而塘成十四年陞湖廣左布政使中
使往來者多以私鹽鬻于府縣索厚價舖行率以破
家鎬和買之民賴以不擾十五年遷右副都御史巡
撫其地贊理軍務命下甫七日計聞遣官賜祭

通議大夫都察院右副都御史林公普長墓志

銘

王 鏊

正德戊辰三月九日巡撫雲南都察院右副都御史
林公卒于家 朝廷命有司治塋域仍命官諭祭如
故事公諱普長字元甫後以字行而更字秉仁成化
甲午占福建鄉薦明年賜同進士出身時尹恭簡爲
冢宰識而異之曰雅粹端重宜居侍從之列奏授工
科給事中先是言官有以言得罪者中外以言爲諱
臺諫徒取克位公獨以獻替爲志乃言今進士科限
三甲恐不能盡天下才宜如宋制增置五甲其四甲

五甲皆授以學校之職庶人才不遺而師儒之職可重疏上忤旨時已詔公用封占城乃罷不遣而遣他使後他使有海禍或以罪戍邊人謂公有神明之助焉久之有旨召恭簡至內曰蕭顯等六人皆外叙公名預焉以母憂獨免服闋改南京禮科以憂去弘治中仍署本科未幾擢都給事中時儲貳尚虛公言宜早建以定國本土魯蕃以獅子來獻公言宜卻之以明明主不貴遠物時議且復用汪直王越公言二人極之尚未遠可復用耶餘若抑倖進慎選舉恤災患節財用溥恩宥優畿民皆累累爲 上言之癸丑擢

山東布政司左叅政時齊魯旱甚所司方於歲額外多斂以備賑濟公曰與其多取以濟民孰若寡取之爲濟廣且均也會營德府妃葬大治瑩域公不可于令承奉長史論之又令諸藩臬論之又面論之終不可乃易人董之擢雲南右布政使未浹月轉陝西左布政使時方饑饉重以師旅公轉餉維時師以克濟擢都察院右副都御史巡撫四川值寇作公嚴督將領平之有襲衣白金之賜蜀歲轉餉松藩路出蕃中蕃人劫掠邀利官吏又緣以侵牟蜀人病之公設方略禁貪緝橫其弊幾絕而議者顧不便焉甲子改命

巡撫貴州旋又改雲南以積勞賜誥進通議大夫推封三代且錄子有恒爲胄學生公時已病痿在告疏三上始得旨給驛以歸逾二年卒春秋六十有四公長身美髯眉目朗秀襟度冲粹不見畛域而執守堅定不以利搖勢奪家居敦行孝友置九牧祭田緝譜牒復孝義堂居官潔廉明慎所至人懷之凡汲引人才人未嘗知寮友嘗被誣以身家保之竟亦未使之知也林世家閩之莆田世稱九牧林氏

右副都御史張廉傳

實錄

右副都御史張廉字孟介浙之歸安人成化丙戌進士歷刑部主事員外郎郎中擢江西按察司副使時賊寇廣信永豐銀礦廉命塞之以絕其望遂潰散轉貴州按察使奏誅印江豪酋置縣官及遷左布政使與征都清苗寇有功請增貴州解額自廉始擢右副都御史巡撫貴州疏言屬府黎平僻遠而五開軍衛牽制兩省宜令湖廣兵備副使聽節制及削鎮遠土官置縣官如印江例皆從之廉剛方鯁直好面折人過動與物忤由是被論劾致仕行之日父老軍夷無

慮千數遮留之正德四年四月年七十六卒于家既
卒家無厚產鄉人以此重之

雲广洪都御史漢傳

李開先

洪公諱漢字天章別號雲广曾祖大隱行甚高祖士
中父讓俱贈通議大夫都察院右副都御史母李氏
妻司氏俱贈淑人幼入縣庠以講書見稱縣尹張慶
政暇每早召至後庭講近午方出給之紙筆甚多巡
按于鄉試後卽出巡至章意將爲其鄉人報復益其
鄉人有先任縣尉者衆秀才曾在上司處發其奸而
罷其官三日下學撤籤講書方展書卽斥出跪于二
門外如是者凡五六人公揣其意在背講因密告長
教若舉善講者則以吾名應之已而舉及卽至書案

前照常禮畢稟講何書巡按厲色曰講中庸纔吐一
句卽怒曰誰教爾講首章熟易者衆連聲速其跪伏
公不少動巡按乃命講中庸卒章公先朗誦經文一
遍然後貼註詳解有節奏有理致承上起下處更有
照應巡按大喜謂此生曾入試場否應以入而闔學
偶乏科巡按笑曰有是人而不取作解首主司可謂
無目矣且對書講書何難如應試亦將携書耶讀書
埃時乃儒生分內事顧惡有司之不遂其請也厚誣
而力去之本欲有所懲戒有高士在中吾怒無所發
矣盡以有司所備紙筆花紅賞之成化戊子中鄉試
壬辰第進士丙申授工部都水司主事管理濟寧閘
河值天旱水溢權豪往來任其啓閉公嚴立法禁衆
懼無敢肆行者庚子改司虞衡監稅荊州竹木徵取
平恕商民德之辛丑陞署員外郎巡五城街道點視
九門天壇之旁逼近御路秋水泛漲衝成一灘廣數
十丈深三丈中官惡之者將以此中之次日午後
駕出同事者急不能爲謀公卽速集搭綵匠用杉木
爲棚鋪板而覆以土扈從中官乘其釁而不得問之
人而知其事乃服其才後監修大慈恩寺工完同事
者欲援故事乞恩公曰以文職修寺不能諫止復因

之得官豈不貽笑乎衆乃止甲辰陞都水司郎中朝
議以漕政廢弛簡命風厲人員清查公同御史謝文
往焉條陳十事上之而糾治貪婪武職選補老幼運
軍及處置造船事宜興革一應利弊尤其赫然可稱
者也仍劾總漕等官弗稱任使者數人後皆更置別
用漕政一新弘治戊申廣西缺右叅政以公才望超
補之抵任卽爲兩廣總督軍務秦都御史委同陶廉
使歐叅將等查勘田州土官不法事并會征吉田等
處徭獍兼督軍餉所至俱有成效壬子閔都御史仍
委公與陶歐輩再征古田徭獍各領兵馬分爲四哨

約同日發兵陶欲先期公聞之謂同哨歐叅將曰卽
當整頓與俱歐欲守約公斥之曰汝不聽吾言若陶
兵有失事機吾將劾汝矣遂併力進攻果獲首級最
衆惟馬總兵馬叅議一哨失利被害麾下土兵奔逃
公急追回撫諭之衆又告稱絕糧公曰我旣在此糧
何足憂設法水陸竝運軍兵萬餘無苦饑者荆竹嶺
獍賊千餘標掠斷絕行旅公與劉僉事適經其處分
守康叅將謂曰當由舟行陸路必與賊遇奈何公曰
朝廷設官專謂地方今道路不通三月矣吾輩若
再退避道路何時可通耶遂毅然而往賊勢果熾乃

虞徵金 卷之六十一
遣驍勇數百騎爲前鋒繼以步兵夾擊之公亦親御
戎服鼓舞士氣以督其後賊衆登山望見人兵壯盛
遁去路不復梗矣永福地方有徭屬八百餘人占據
民田鎮守副將已發兵二千駐劄將兩月計無所出
公因授筭與劉選委洞曉夷情者先行齎文推誠招
撫仍耀兵揚威以懼之夷皆退散田乃復總督衙門
以其績奏聞蒙 上給賞綵段銀牌仍命捕捉前殺
總兵叅議賊首解京公詣其地幾半載設伏出奇生
擒六十人械送總督軍門發下按察司監候賊穴地
逃去司官俱以罪黜而公以丁憂迴籍襄事如禮丙

辰補江西叅政尋陞四川右布政使在四川善政
人撫按及兩京科道薦章連上古田徭夷復叛都臺
因奏公向在廣西日平賊有功未蒙陞賞乞卽特加
褒獎以勵後人賜大紅織金雲鶴綵段衣一襲戊午
陞陝西左布政使不旬日陞都察院右副都御史巡
撫大同叅贊軍務公至大同訓練軍馬修築墩臺措
備糧餉撫恤軍民糾治權奸搜剔蠹弊風紀振而邊
境肅然非舊日比矣上疏極言便益地方八事而增
守備以專責任演神機以期實用置方田以遏胡騎
寬住俸以借逃官尤爲八事中之切要者蒙恩錫三

品誥命年逢荒旱公遂親製禱文歷數已罪遍詣應祀神廟懇祈不數日大雨沾足白晝星隕朔方墮地有聲援據史占知外夷內侵又重陽祭旗焚紙火墜總兵首衆軍士競撲滅之是非吉徵乃痛加修省嚴整武備未幾虜果大舉入寇乃設兵待之總兵居中遊擊居左叅將居右極力抵却三千人無留者其一以三大砲擊之虜不敢前鎮守太監及總兵等倚恃中貴及世胄不聽節制方略以致失律喪師公引咎自歸連劾失事人等奉命取公回京聽用所奏下法司勘問得實各抵重罪惟太監改調陝西鎮守公因

先在工部觸忤司禮又以邊事論及中官其同類忌之朦朧叅作回籍閑住名色公論大爲不平都給事中任良弼等御史張津等累騰薦剡稱公才猷素著宜同尚書周經侍郎許進都御史雍泰起用以盡其長不報正德庚午以疾卒年七十嘗考一牘而有兩同名者必一盛一衰公是牘有兩洪漢而徽州字朝宗者名位不甚顯不但壬辰如永樂乙未有兩葉恕宣德庚戌有兩王復正統丙辰兩李春景泰戊辰兩張瑄兩劉瑄兩楊瑄俱在辛未一科天順丁丑之王道成化丙戌之徐霖巳丑之鄭宏甲辰之王溥其在

弘治則癸丑曹瓊丙辰陳言壬戌魯鐸正德辛未王
璽辛巳王朝用而丁丑則三張淮嘉靖丙戌壬辰戊
戌辛丑四科同名者張守約高節章煥陳善鮮見官
爵歷年相同者然位無崇卑近久惟不媿于心不負
其職爲可賢耳若洪公者豈非千百中一二人哉漫
及之見古今同姓名錄不虛耳

右副都御史王公珣傳

子崇仁崇文
崇獻崇儉附

郡志

王珣字德潤曹縣人舉成化己丑進士授太康知縣
調繁信陽擢南京四川道監察御史行部蘇松時例
獲盜三百名陞四品俸而部中所獲至數千人珣按
其非實多所平反曰吾不能殺人求進也歷湖州府
知府陞河南叅政轉本司布政旋陞右副都御史巡
撫寧夏以寧夏孤懸河北而境土狹小當先守後戢
因濬賀蘭山渠以廣屯田遏虜騎邊防賴之虜寇花
馬池深入臨鞏總兵郭錡以衆寡不敵不敢出戰珣
曰虜深入獲利而還實驕且疲以逸待之勝可必矣

戰於石溝破之進階通議大夫無何以疾致仕章再
上得馳驛還珣爲人孝友少時爲兄璉所撫及考滿
受蔭官其兄子以報之里人稱焉卒賜葬祭如法祀
於學宮所著有奏稿十卷南野詩稿二卷

崇仁字仲安珣第二子也第正德戊辰進士授工部
主事時土木繁興貂璫競爲請托崇仁蒞之以正上
下肅然盜起兗豫奉詔討之仁綜理諸營器具先事
備辦兵士無譁遷刑部員外郎轍下獄事多涉權貴
皆據法治之出爲江西僉事宸濠潛蓄異志其妻黨
素橫悉裁以法濠欲中傷之乃餌以重幣崇仁辭不
受改陝西副使飭兵洮岷時虜酋亦卜剌出沒西海
因上區畫事宜當道不用遂引疾歸今祀學宮

崇文字叔武珣第三子也弘治癸丑進士授翰林庶
吉士改戶部主事歷員外郎中 武宗卽位遣中官

織造因討長蘆鹽萬二千引鬻銀買料崇文與李夢
陽等言於尚書韓文執奏至再請但與六千引內監
憚之歷江西四川提學副使擢山西叅政壺關盜起
將發兵勦之崇文戒勿輕出諭以禍福多所解散因
擒其首惡餘黨悉平由河南右布政使陞右副都御
史巡撫保定引疾罷歸卒賜葬祭如法今祀學宮所

著有兼山遺稿

崇獻字季徵珣第四子也弘治丙辰進士選翰林院庶吉士後改禮部主事以逆瑾擅權引疾告歸瑾銜其避已削籍爲民瑾誅改兵部主事時山東江浙巨寇稱亂崇獻條陳六事悉見採用寇平賜白金文綺西北夷兀良哈入寇用總制叢公薦屬崇獻往乃先聲搗巢棄馬用步筭無遺策沙嶺之圍遂解尋陞郎中奉命徵南直浙江驛傳役銀盡革積弊歲餘得銀四十餘萬陞南京尚寶司卿以錢寧專政復引疾去嘉靖戊子用言者薦起爲南京通政司右叅議再晉

南京太僕寺卿癸巳拜左僉都御史巡撫寧夏偶感時事三疏乞休得歸家食三十年屢薦不起扁其堂曰三巳所著有孫子釋疑小學撮要禮記擇言雙清詩集韻語拾遺等書

崇儉字叔度珣第七子也舉嘉靖辛丑進士會考選庶吉士有達官見其詩翰者謂曰以君才學宜居上選惜年踰三十若稍減一二入選必矣崇儉正色曰天下豈有未事君而先欺君者乎達官愈重之觀政通政司未除官而卒所著有五桂堂稿春秋筆意等書

右副都御史艾公璞傳

楊一清

艾公璞字德潤號東湖南昌人父敞號梅亭精于醫
是生公少學于郡人羅評事羅大奇之曰此子殊穎
悟他日必有聞于世恨吾不及見耳成化間登進士
第授工部都水兵部武選主事弘治間歷遷武選郎
中通政司右通政光祿寺卿都察院右副都御史巡
撫蘇松諸郡總理糧儲所至有聲如羅言初公方成
童爲從王父所愛求立爲再從父後梅亭翁不可所
迫于從父命從之然非其情也則憐惜之至憤惋不
食後公貴於所爲後父母旣移封矣至當以通政加

封則備諸服色冠裳遣使馳上使還日忽不樂淑人
魏恠問之泣語其故且曰吾所爲父母已有子無用
吾爲後理况此事非吾父意與思及此肝腸寸裂且
今之人處此或朝仕而夕改吾竊病之吾今於再從
父母薄致祿養再移誥封亦尚盡心耳矣顧於吾父
母憇然未有報其何能爲情哉吾今竊有圖矣淑人
卽贊決之於是馳書所爲後父母遂上疏陳情事下
吏部覆奏許之公乃立四代主俯伏痛哭于考妣告
曰不孝兒歸奉祀矣已復別設一龕用祀從王父焉
及再從父沒心喪之如考妣公好義樂善尤篤于倫
理弟珊歿遺孤欽少時携至京師教育之俟有造俾
進諸學宮學焉再從父子壁蕩用官馬價至千金官
徵之無從得則桎梏諸囹圄公聞而泣曰吾不援弟
其死于獄乎遂罄囊貲爲輸官不足稱貸于人又不
足繼以田產壁始獲釋矣族人或不能昏葬每厚遺
濟之鄉宦某客死貧不能歸公賻之衣棺舟車親往
斂送之其素履如此比居官自都水主事至爲政
日務舉職其在兵署選將籌邊多所裨益嘗奉建儲
詔使朝鮮賜一品服以行至其國秋毫無所取及爲
光祿悉得諸故所作無益事歎曰夫民財可如是耗

邪卽具疏欲一切革之疏且上僚佐懼妨諸權貴止之公不聽已而得旨報允遂著爲令省費鉅萬 孝廟勵精求治屢下詔求言公首陳慎修德時布告固國本舉良將重憲臣飭守令六事又陳聖政虜患田賦散戎四事他如減齋醮節供用諸奏皆人所難言洎南畿巡撫半載間徧歷所部郡縣問民疾苦察利與弊而興革之崇明有捕寇恃海洋險阻越人取貨攻城剽邑大爲民患屢招之不服公知其不可化也乃陳卒集餉具戰艘爲勦捕計會勅至令督兵殲之公乃指畫出師由海道夾攻浹旬而平捷聞 上降

勅獎諭賜文綺白金百姓爲立生祠肖像祀之復勅碑識焉有勲戚家與無錫民訟田官知爲民產懼獲罪巨室莫敢公言者公承勘廉得其情悉歸之民遠近稱快屬逆瑾竊政巨室以賂行田訟復作瑾勢方熾使者覆勘惟風旨是承乃悉以田歸巨室顧劾公前勘非於是瑾僞傳旨逮公詔獄訊之公不屈曰實民田也瑾怒箠之幾死令遷家海南爲編氓家人與公行數日方蘇哭公曰吾猶生活又何哭爲公居南三年瑾誅奉詔還復官致仕杜門謝客暇則遊城東別墅酌酒賦詩以爲日家廟未建曰事孰大於此乃

卜吉市材命工創建於居室之東遷主居焉時言官交薦起之未及用而卒正德七年壬申歲也公生於景泰庚午至是壽六十有三矣 論曰予聞諸鯁直之士多剛復難近而醇謹者或沉默取容跡公平生所為孝友和易可謂醇矣而其立朝每持正論臨事不詭隨又何直也昔孔子思中行之士公其殆庶乎

遭際 孝廟聖明有所敷奏多見采行眷禮優厚不可謂不遇矣晚值逆瑾中奇禍瀕死播遷及其復也且柄用之而遽以計聞惜哉昔王祐按符彥卿事貶官曰吾

有德及人雖獲譴後當有顯者及子且相果驗公事與祐同其後亦當與無異彼橫來者惡足為公病耶

都察院右副都御史周季麟傳

實錄

都察院右副都御史周季麟字公瑞江西南昌府寧

州人成化壬辰進士授兵部主事歷員外郎郎中陞

浙江左叅政武康有羣盜躬往招諭平之興水利賑

荒歉皆有善政陞河南右布政使尋陞左布政使周

王怒其世子欲罪之季麟為之調護王怒解父子慈

孝如初陞右副都御史巡撫甘肅諭土魯番番酋

歸所虜哈密忠順王陝巴乃奏還所畱番使又增築

要害以為守禦計調巡撫陝西革前調省城防冬民

兵四千止以千人番代又用內閣大臣薦調巡撫薊

州會勘御馬監收馬草場其所侵民業考諸圖籍正
之不避貂璫之怒時有論其傳奉改鎮者蓋不知其
出於密薦也乙丑以病乞歸後逆瑾擅權以事落職
又罰米千石瑾誅例復官未用正德十三年十二月
卒

巡撫大同地方右副都御史歐信傳 實錄

巡撫大同地方右副都御史歐信字孚先順天府薊
州人成化甲辰進士授戶部主事奉命賑京西活饑
民以萬計爲郎中督餉大同增置東大有倉乘賤易
粟備用歲積至五十萬石歷浙江叅政河南右布政
使山東左布政使俱有聲稱後陞右副都御史巡撫
大同始至卽選將訓兵綜理屯牧修舉廢墜未逾年
而卒時正德元年九月如例賜祭葬信修幹美儀邊
幅整峻才足集事亦一時能吏也

嘉議大夫都察院右副都御史西野曹公鳳墓

志銘

韓邦奇

正德己巳五月二十一日公卒初丙寅以來八黨擅
權而瑾尤肆毒中外稱爲內相凡藩郡入爲京官必
重賄方免禍見則長跪稽首內相不爲禮丁卯公自
巡撫延綏都御史回院公弘治中所造士也不習諛
禮又不知賄事適 朝廷十日不御門或曰盍先謁
內相公曰未見 天子而先謁權宦邪不見瑾固舍
怒後見瑾又長揖不拜瑾佯問入京幾日示見遲意
公曰十日瑾又言都御史知回院故邪公曰 聖恩

也瑾復問何以報稱公曰都御史風憲官振肅紀綱激揚淑慝耳瑾怒目揖公出公歸卽上疏乞休不報旬日再疏亦不報時瑾嚴勘天下錢穀以中士夫禍勘使者希瑾意言延緩布糧浥瀾過緣主者公適丁外艱所司奏公當守制瑾乃罷公官聽勘竟誣公償布五百粟千石立限繫家屬緩則將籍公家公亟鬻世產完報然瑾怒未解也公隱憂發憤端坐不疾而卒明年庚午瑾誅朝廷遣官諭祭且給金營葬及今葬事且不能如制而墓銘尚缺云公姓曹諱鳳字鳴岐別號西野河南汝寧新蔡人高祖諱世隆曾祖諱恭祖諱英考諱端以公御史時封如公官性度夷爽廉信不苟妣劉亦以公貴封孺人天順丁丑十二月初九日生公前一日孺人出於外歸見火光如車輪當其前明日公乃生公生而靈異比就外傳略加訓說卽了大義甫三載舉子業度越諸生尤以檢柙身心爲務天台陳公選大儒也督學中州甚器重之成化丁酉鄉試中式辛丑登進士除徽州府祁門知縣或爲公難之曰祁土浮俗僞且健訟當思以處之公曰若使我先逆民耶逆必設機械不得則重刑將有悞罹法網者卒不以僞逆祁民凡訟至分下都長

虛心考其成隱奸巧詆莫遁其情然亦不深疾也祁
民愛之於是祁門治行爲最而當時微之諸邑莫不
推先祁門者三原王端毅公爲冢宰雅知公弘治已
酉公考績謁部奏薦陝西道監察御史陝西王公鄉
也當 孝廟熙洽之世公獨持風裁崇論正議多所
嘉納嘗奏事失儀鴻臚糾上 上特宥之謂左右曰
曹御史好官當略其細過辛亥御史奏蹟於是封公
及劉孺人皆獲封焉巡按江北潁州僉事某傲虐不
戢公將論之然僉事素善持人短長且嘗忤公而潁
新蔡又甚邇或謂公曰此易與諂階宜寬之公曰身

爲風憲而避嫌不激濁必將挾私而傾善矣竟劾罷
之一路肅然御史七年陞蘇州府知府蘇州富饒甲
天下俗迺奢靡且崇祀非鬼親死則多火之公下車
首置義塚以畀貧者而禁火葬定婚喪禮不得過制
凡餼迎時序一切務從儉素違者刑之毀淫祠政平
訟理而當時各郡又莫不推先蘇州者弘治壬戌述
職入覲時宰臣奏宴天下賢有司於廷公與焉益異
數也尋陞山西左叅政湖廣右布政擢都察院右副
都御史巡撫延綏地方 孝廟時虜久不入疆場無
警武備稍弛公蒞鎮則嚴部伍實倉廩謹操練明賞

罰推誠馭下將士感悅各思効力終公之任虜至數
止邊外無內掠焉回院而遭瑾禍卒享年五十三歲
云公性清介孝友私居終身不御紈綺不畜婢妾不
問貨殖父母兄弟無間言與人和易不爲矯激之行
處鄉黨恂恂無貴人氣所至遺愛在民祁門則豎碑
立祠蘇州則誌列名宦延綏則將士戴服至今猶有
過其宅墓而問且拜者至其不屈身於權瑾危行大
節一二於天下余總河道時公孫亨守竟以循良聞
上交下文無抗行無過禮余心異之及詳公狀乃知
公家法源流遠矣

都察院右副都御史杜公忠墓志銘

王鴻

昔大儒先生論位義之心人所固有而此心甚微必
用力於語默之際乃克塞而可大若宜語而默宜默
而語因飭之以致其情皆以爲穿窬之類可謂嚴矣
後世薄夫顧反迷此義陽開陰闔神迎色拒益以眉
目手足佐之鈎距揣摩端倪不露而誘掖如神俾人
出心腹腎腸傾輸無餘蘊然後操以爲奇貨而人或
有不得其死者吁其憐矣天賦人以仁義豈端使然
哉若故都御史杜公則不然公資稟坦夷內無城府
意氣軒豁加問學勤敏尅治融釋愈益完粹與人言

洞見底裏人有小善亦游揚不置或不及而請益則
懇款詳至無少畱藏事有難處公必爲之盡異同祿
利害以求其善卽成敗不驗於後人亦感其忠蓋也
性剛毅疾惡如讐值頑率悖傲賊仁殘義麗刑書者
雖要且近不少貲如公者豈非所謂不失其本心者
邪公諱忠字世臣先爲盧氏人祖恭用薦授河陰訓
術遂占籍焉公自少修謹性不樂傲放補邑庠弟子
貢家居去縣十餘里晨往夕返手一卷於塗且行且
誦其勤如此成化戊子舉於鄉戊戌登進士明年除
濟南新城縣令越五年甲辰召爲浙江道監察御史
弘治辛亥出守平陽庚申遷山西布政司左叅政乙
丑遷四川右布政使正德丁卯轉左布政使仍臨山
西未幾卽拜都察院右副都御史巡撫延綏地方居
一歲卒年六十有八卒之前三月公嘗上章乞致仕
得請 命下而不能起矣實戊辰冬十一月十三日
也始公之令新城也分寧周公公瑞稱其質直忠信
議論操履皆有前輩風其爲御史也四明楊公維立
稱其剔蠹治姦踔厲風發其爲太守也括蒼俞公尚
賢稱其百廢俱興爲民所愛戴其爲都御史也太原
周公伯常稱其篤實老成無所往而不宜此四先生

直以
數名
人之
言爲
證不
必多
其事
而美
自見
前輩

之文
如此

者皆當世元臣舊德人所取信者其言如此則公爲仁義之人可徵不誣矣公父諱植累贈平陽府知府母王氏累贈恭人娶張氏累封恭人先公二年卒子男三人汝松汝栢俱生負汝楠醫學訓科女三人長適衡琇先卒次適陳鎮次適張嘉儀孫男四人守經守約守綱守紀女三人汝松等卜以四年十一月七日葬於古滎陽成皋之間先塋之次託今光祿丞許君本謙命銘於鴻儒鴻儒於公託交頗早而受知最深是曷可以辭乎

都察院右副都御史徐節傳

實錄

右副都御史徐節字時中其先績溪人占籍貴州衛成化壬辰進士授內鄉縣知縣有治行擢監察御史遇事敢言不避權要嘗疏錦衣指揮牛循罪及顯詆大學士萬安之失風裁凜然弘治改元遷直隸太平府知府時郡中大疫節悉心治療全活甚衆進雲南右叅政以平梁山竹箐米魯諸賊功陞二品秩壬戌陞廣西右布政使征思南給餉有功甲子轉廣東左布政使丙寅進右副都御史巡撫山西會逆瑾擅政見忤削秩罷歸瑾誅詔復職致仕正德十一年卒節

祠二
驢送
過客
甚奇

當與
徐句
容事
並傳

居官甚廉謹不忍擾民在太平飼二驢於私廨鄉人
過郡者以驢送出境驛遞皆不與知其守法類是

都察院右副都御史冒政傳

實錄

右副都御史冒政字有恒直隸泰州人成化乙未進
士授南京戶部主事歷員外郎郎中弘治庚戌陞武
昌知府守正奉公多所興革尋陞山東左叅政分守
東兗弛南旺湖禁以食貧民又分守遼陽正德丙寅
由遼陽陞江西右布政使將發以所餘餉銀千兩歸
于代者毫髮無所取奉新饑盜且起政賑恤有方一
時晏然丁卯陞右副都御史巡撫寧夏劉瑾以政前
在遼陽軍儲有虧耗逮治罰米三千餘石累歲事方
竟褫職以歸瑾敗復職致仕正德十四年二月卒賜

肅徵錄 卷之六十一 二十九
祭葬如例政爲人質直坦易居官廉正卒後家無餘
資其子稱貸襄事士論重之

都察院右副都御史曲銳傳

實錄

曲銳字朝儀山東萊陽縣人成化辛丑進士任大理
寺評事寺副出爲福建四川按察司僉事松潘兵備
副使改河南陞陝西按察使都察院右僉都御史巡
撫寧夏進南京禮部侍郎改右副都御史仍舊巡撫
銳旣屢陞擢劉瑾怒其不謝已勒令卽舊任冠帶閒
住瑾誅聽還鄉復其官階正德六年十二月卒銳有
吏能所至獄無滯囚其在四川馬湖土官知府安鰲
恣橫行部者多避之銳誘執置之法疏請改流官州
人德之故其以父憂服闋給事中劉蒞請令復任四

川以爲其才宜於蜀也其後不污於劉瑾益亦有以
自守云

都察院右副都御史朱欽傳

實錄

都察院右副都御史朱欽字懋恭福建邵武人成化
壬辰進士授寧波府推官擢監察御史風裁凜然陞
山東副使以憂去服闋補浙江尋陞按察使湖廣左
布政使進都察院右副都御史巡撫山東以民俗多
酣酗下令禁釀適內使過境不得縱謗於劉瑾被逮
入京有勸其賄免者不從然瑾竟不能害得致仕歸
尋撫舊事奪其職瑾敗仍復之欽端重有威儀居官
清直所至以聲績著爲諸生時刻意考亭之學往遊
徵士吳與弼之門以道稱于閩正德十五年四月年

七十七而卒

都察院右副都御史安惟學傳

實錄

安惟學字行之山西臨汾縣人成化二十年進士爲行人歷工部郎中平涼知府陝西叅政浙江右布政使陞右副都御史巡撫寧夏時劉瑾方遣官覈屯田邊儲惟學承望風旨所行過刻軍士多怨之者安化王寘鐸因而謀逆欲先殺鎮巡等官而後發兵何錦率其黨進公署惟學方與都指揮楊忠議事錦殺惟學于座上故恩典不及然惟學居官亦以清謹聞

撫都御史黃寶傳

廖道南

黃寶字廷用長沙人高祖興輔洪武初爲監察御史
寶登成化甲辰進士授吏部驗封司主事內贊訐謨
外閑儀矩上稽時政下叅仕籍惟慎惟清罔或訾議
弘治中歷陞文選員外郎郎中懸水鑑以收俊乂操
水蘖以勵風節一八柄以詔休媿綜六計以甄循良
別善最以察勤惰黜貪頑以謹愆愆遷爲太常少卿
修郊禋廟祧貍沈駟辜之禮禮克用正舉雅南絃頌
寄鞮譯之樂樂克用章十八年間協氣休徵稟爲馨
香者亦不能無少助也正德初擢通政晉應天府尹

陟都御史巡撫陝西時潼關以東民如縣磬花馬以南虜多陸梁皋蘭以北城堡圯廢臨洮以西羽檄旁午寶深思其患力以處之廼肅紀律清壁壘預餽餉防烽燧恤災沴屏黠狡猶恐北虜西戎互相援應則我軍難支彼類益橫建議斷其右臂扼其中吭以犄角之故河套虜酋莫我敢犯秦有寧宇逆瑾柄國罷歸瑾敗復起巡撫山東不踰月移疾歸卒年六十有八

都察院右副都御史陳公鎬傳

京學志

公名鎬字宗之系出會稽大父嵩以通天官學徵赴南京占籍欽天監父懾繇鄉舉爲豐城教諭公賦質卓穎少受庭訓以文行聞成化丙午鄉試第一人丁未成進士授禮部主事乞便養改南吏部郎中晉山東提學副使爲人明敏有吏幹董學時校閱精覈公廉詳慎終始如一諸生登降之序皆自書之不假手吏人輯洙泗誌振發士習諸生感其風誼興起成就者甚多齊魯間稱名督學必首推之晉江西叅政庚午晉湖廣布政使會漢沔盜起流劫郡縣民之貧無

虞衡錄 卷之六十一 三十四
賴者蟻附其間徒黨日衆公設方略督兵以次討平之餘賊未盡 朝廷卽晉公都察院副都御史巡撫其地公歎曰良民可驅而爲賊顧不能還賊爲良民乎於是移檄諸郡脅從者不治湖湘素服公威信見檄卽盡散歸農益負固阻深者咸喁喁有更生之樂矣壬申以疾乞歸命未下而卒所著有矩菴漫藁金陵人物志行於世

都察院右副都御史李進傳

實錄

李進字時勉平陽曲沃縣人成化己丑進士授戶部主事遷員外郎郎中督餉宣府公于出納陞廣平府知府其地斥鹵恒苦旱進至特建石閘引河水灌田民利之改濟南陞四川右叅政江西右布政使河南左布政使陞右副都御史巡撫宣府時北虜寇邊諸將失利於魚臺嶺官兵多敗死言者因劾進進亦上章自劾遂引疾歸正德七年十二月卒

都察院右副都御史姜洪傳

實錄

姜洪字希範直隸廣德州人成化戊戌進士初授盧氏縣知縣擢貴州道監察御史陳時務八事彈劾不避權倖謫山西夏縣知縣擢廣西桂林府知府所屬古田縣久爲猺獞侵擾洪奏調兵討平之民賴以安屢擢雲南左叅政山西右布政使逆瑾方擅政諸省有賀印錢山西獨無瑾中以法矯詔罷歸復罰令輸粟於邊瑾誅起爲山東左布政使時流賊猖獗調度兵食勞瘁成疾嘗上用兵事宜多見施行未幾陞都察院右副都御史提督鴈門等關兼巡撫山西未踰

年竟以羸疾卒于官時正德七年六月洪性亢直居
官清介身後家益落不能舉其喪久之始克葬云

都察院右副都御史賈公錠墓志銘

公諱錠字良金姓賈氏別號東林世居安陽之大韓
鄉曾祖文直祖振俱隱德弗仕父贈文林郎監察御
史琛母張氏實生公幼有奇質刻志苦學弱冠補郡
庠弟子負成化丁酉領鄉薦戊戌春聯舉進士授知
山西汶水縣汶水民健訟公至務以德化遠近帖服
甫三載以賢能被剡薦召授湖廣道監察御史滌其
行囊橐蕭然民故有包老之稱老稚遮道悲號不忍
違畱其履以識愛慕居臺端未幾卽巡中路風裁粟
粟盜賊逆息丁外艱奔歸哀毀踰禮服闋按遼東有

都指揮李姓者久橫不法公首劾之武弁震懾而邊地肅然再按兩浙值溫處礦賊陳廣鬍等搆亂勢焰甚烈公不避危險提兵勦平之捷報 上有彩幣之賚比回奏績最贈公父如其官母妻皆孺人弘治壬子擢福建按察僉事時建寧礦賊猶溫處撫臣以公請 上可之勅兵備其地一方以寧遂擢憲副歷山東憲長左右布政使憲度嚴明德意誕敷在在有聲而公之清操益至正德壬申晉今職巡撫陝西等處地方兼贊理軍務丁內艱聞計即日歸時逆瑾恣橫羅織百司以公居方岳直慙不阿坐事罰米千斛輸邊傾家償之畢事懼他禍遂乞休情極迫切再疏乃俞之瑾敗銓部累起公公辭不赴今 皇上初元詔晉公秩二品階資善大夫優遊林下方事行樂又明年以正終于寢距生正統戊辰享年七十有六公性資沉靜器度宏雅嘗以矜莊自持自外觀之貌若遲鈍及其臨事毅然有爲雖甚難處者無不曲中別歷中外餘三十年始終一節不少渝其居林下十有六年自處一室無他媵妾暇則課子讀書惇行孝弟絕口不及時事物論高之

都察院右副都御史張淳傳

實錄

都察院右副都御史張淳字宗厚廬州合肥人成化
丁未進士授瀏陽知縣擢監察御史會岷府奏逮知
州劉遜科道論抹俱下獄淳方自外還抗疏請惜耳
目以庇元首 孝宗意解尋釋之遷吉安知府俗故
健訟蔓引動數百人經歲不決淳惟取當逮者訊之
剖析如流獄詞輒手書片紙示吏吏無所措其姦版
籍多巧僞淳廉得其實役均弊絕久之豪猾屏迹公
庭晝靜若無事者郡收給引直號堂食錢前守率取
之以爲常淳悉畀廬陵縣公用歲省民財數千兩自

奉甚薄食朝夕惟一鮑魚秩滿歸橐如磬正德丙寅
遷四川按察副使整飭松潘兵備轉南京太僕少卿
進應天府府尹務寬徵需以節民力癸酉擢右副都
御史撫治鄖陽時四川劇賊新敗疏請駐兵房竹等
處以防奔突賊平有璽書金幣之賜其冬改巡撫保
定等府兼提督紫荆等關淳行部防範少嚴或時寄
耳目於下爲所欺會言官劾其攜子索賂淳不自安
卽求養病歸正德十四年十月卒例賜祭葬淳修髯
火色剛果自信治郡最有遺愛雖古循吏或不能過
晚節功名頗損論者惜之

右副都御史張公淳傳

郡志

張淳字宗厚僉事故之孫太學生鎰之子也成化丙
午薦於鄉明年登進士初令瀏陽有逋賦歲積萬計
乃糧長侵費公至喻以忠言皆感泣來輸三年政成
召爲監察御史每疏入言多剴切不避權勢時有坐
言事下獄者公恥不與抗疏救之得釋頃之出按貴
州有負固者乃招撫之擒渠魁普安阿保父子餘黨
五十九塞悉爲編氓轉吉安知府吉民健訟公以一
言折之訟卽平課農桑興學育才修里社敦尚節義
民爲創賢侯祠尋陞四川按察司副使鎮松潘適諸

番叛乃名集諸將授以方略皆相繼授首諸番懾服
進太僕少卿綜理馬政務在便民轉應天尹多惠政
士民賦京兆十思以歌之擢右副都御史撫治鄖陽
不逾月有巡撫保定之命是時傳報邊警公經略邊
務悉心區畫達虜聞風遁去河間諸郡告饑奉勅賑
濟全活者以萬計進階通議大夫上疏乞歸 上以
溫旨慰留疏三上始得馳驛回籍調治蓋殊恩也公
居身清約惟敝屋數椽田二頃園一區客至談說經
史或世故移日不倦有請託者禮遣之故人不取干
以私卒年六十有六葬祭恤典恩禮

有加焉生二子
長卽前次二標

都察院右副都御史陳公壁傳

實錄

陳壁字瑞卿山西太原左衛軍籍直隸揚州府高郵
州人舉成化壬辰進士授嘉興縣知縣性抗直不折
節權貴人凡上司以事臨者與辨析民情利病侃侃
不輒撓終能以氣服人後因薦擢江西道監察御史
益勵風裁不爲委瑣齷齪中尤坦直披肺腑論天下
事常持大體而臺紀克振久之進山東兵備副使扼
臨清漕河所經實要衝之地夫役百需蠹弊甚一切
裁省冗濫有貴璫怙勢搖吻于民難饜壁折以法璫
恚怒擊其首竟莫能奪其他均徭役剔奸宄掖良善

清武備大者數事清源一帶德如父母尋以民望所屬進本司憲使時郡縣吏日惟繁訟取贓民率破產輸納甚者庾死于獄首下令禁之繩貪墨甚嚴其倚法爲奸有所侵牟者黜弗貸故境內諸猾悉斂戢無敢弄手十五年陞南京太僕寺卿董牧事馬政自兩京竝設以來畱垆益安常襲故堂宇廟廡日就朽蠹甚或傾圮不稱至則節縮帑餘重修飭之又建棲雲環山二樓分毫不累於民而所履嚼然會邊鄙不聳兩京歲取備用馬萬匹南直隸止三分多准折價以便寄養壁從容處分州縣安輯無擾尤與人信不侵爲然諾寮屬有過率指摘之亦莫不委情輸素若投醪然踰三載陞右副都御史整飭薊州等處邊備兼撫順永二府卽奉身勇退以養病歸家性孝友重行誼待兄千戶某如父嘗以御史居家久微譴受朴無難已官山東僉事某爲御史時有隙及卒傾貲斂之故人皆高其義云

通議大夫都察院右副都御史高公琬墓志

嚴嵩

公諱琬字德資成化戊子占江西鄉試戊戌登進士
歷知松陽上海二縣名爲南京貴州道監察御史陞
松江知府陝西湖廣叅政右布政浙江左布政已而
拜右副都御史撫治鄖陽公器貌端重爲政矜嚴持
大體曉達民事謹慎點檢所至舉其職而上海松江
之政尤稱最上海松屬邑也地大賦繁公至減官糧
加耗奏以餘糧編銀僱夫民稱省便官稅徵解歲有
羨餘數百金前政者例受之公則斥以建學舍齋閣

屏宇館傳之敝圯者鋤抑豪強發擿姦伏屢辯疑獄
終其任無敢干以私聞父喪卽日奔歸民懷慕齋餽
追至其家一峻拒之爲御史風裁凜峻出按蜀戎籍
持平不苛稽審有法衆號得體適松守缺松人咸願
得公爲守語聞吏部以公往益公前在上海威信孚
於民又熟其利病及爲郡邑邁往踔厲凡所興革弛
張舉措務建經久長利期無遺便乃已用文學飭吏
治考大成之樂間詣學官飲射讀法率學官弟子親
爲講說課試高等者慰寵之飭陸宣公周文襄之祠
表忠節貞孝百廢具興松故饒財俗尚侈靡公身爲
儉約先之食不重肉客至豆觴魚脯一飯而已禁燕
燕俳優雜劇不一陳于前考公所爲庶幾君子德義
之風矣撫卽時劇寇劉七猖獗連河鄧襄蜀數州患
之都御史彭公澤專總制公受勅調漢土兵併力追
勦計畫勞勩渠黨就獲璽書獎勵有襲衣白金之賜
衆方多其功顧爲言者所抑得旨名公將別用之公
還過家卽臥不復仕矣有司議平賊功猶以白金彩
幣卽其家賜焉 今上登極推恩廷臣公雖家臥援
比以請詔賜誥進階通議大夫祖諱原亨考連江丞
諱仕忠皆贈通議大夫都察院右副都御史祖妣某

氏妣胡氏皆贈淑人益異數云家居十有五年年八十有五

通議大夫都察院右副都御史進階正奉大夫

陳公璘墓志銘

韓邦奇

陳公卒計聞 上命禮部遣官諭祭工部營葬事公

諱璘字邦瑞號一石山西太原之陽曲人也曾祖福

聚祖榮贈知州加贈右副都御史配趙氏贈宜人加

贈淑人父智兩淮都轉運鹽使司同知封右副都御

史母周氏初封宜人加封淑人公幼聰穎度越十九

歲克府學生弘治己酉中鄉試第二癸丑賜同進士

出身第一授太常博士乙卯相 孝廟享南郊見博

士氣宇周旋悅甚面咨何官益欲超遷不果錫之寶

鏹一時縉紳稱榮云戊午拜監察御史巡居庸諸關
關者崇岡峻壁天限華夷城守之固若金湯前後監
察益率付下吏閱圖貼竟事耳于是御史乃躬歷險
阨疏可城守者立將官增戍兵曰勞一時可爲千百
年之計者 上曰御史言是益迄今邊腹永賴云未
幾巡按山東有近貴來山東取礦砂益近貴素多內
援又荷 上命若御史無若我何御史曰民力竭矣
豈復堪益此邪疏論之礦役竟罷蔡河淤塞河流逆
洑民田匯爲巨浸而稅尚在民民自之御史御史曰
是可導入漕河者益後蔡果入漕粒食乃登云先是

孔闕遭回祿修未完御史度工定期尋乃奏成 上
遣官立御製碑文特嘉御史績第御史執法不阿多
忤尊貴人尊貴人盡憎嫉之遷浙江提刑僉事人多
心不平云僉事至浙摘發輿除不異山東時旣而又
遷陝西苑馬少卿少卿亦不以苑馬爲閑散馬益蕃
息焉時少師楊公總制三邊疏薦少卿賢遷布政司
叅政督軍餉於是邊儲大足而民且稱便云遷河南
按察使其時豪猾交納宗室侵越法制及發覺又依
憑城社人皆患苦之按察使下令曰自今敢匿人者
連坐捕獲悉正其罪境內肅然鎮守王太監殘墨特

甚民不堪命按察使面責之王亦知自戢云遷右布政轉左布政自此經濟大略益著乃遷都御史巡撫湖廣改撫延綏益北虜寇邊警報特甚以都御史抱壽邊才也于是繕城堡利器械足倉廩募戍兵選將官邊威益震丙子虜賊寇邊斬獲甚多 武皇降勅

獎勵定靖清平邊墻功成有金幣之錫虜復寇邊復大斬獲捷聞 上嘉都御史能賜蟒衣三襲益異數云都御史三年天官舉常憲奏上錫誥推恩及祖且賸嗣入監旋推兵侍公以轉運翁及商淑人老累疏乞歸 上曰璘素有才識又曰璘操守清慎也有旨

勉留着用心巡撫地方乃復起視事時總兵柳勇叅將李永定把總許國卜雲交納中貴人緣為姦利實心怨之目為四害都御史曰凶虐若此坐視之是都御史縱虐耶劾罷之三軍稱快會大將軍彬導天子北巡邊塞駐蹕延綏彬黨橫甚都御史執大體酌時宜雖彬兇焰竟不害帥臣戴欽恃其權位又彬黨也敢肆簡傲都御史怒甚蓋手自擊之有逆子既成獄彬欲活之亦不聽邊人相語為真都御史云乃都御史又引疾乞歸 上亦不許報曰璘素有才譽有疾善自調理以副委任亦不允蓋未幾而商淑人轉

運翁計先後至矣公自以前後乞休心本爲親乃弗能侍湯藥奉治命哀痛踰禮幾至滅性疏聞上命工禮二部祭葬如例時彬又導天子南巡江漢延議以上郡北邊重鎮天子外巡乃奪公至情畱候代已而武皇上賓有不好公者疏論公謂都御史宜罷詔從之公竟罷去未幾詔進公階正奉大夫云公才旣敏達而性復剛毅茂實敦本崇儉不能爲閃倏媚悅之態爲諸生時教讀提刑司有攘金人爲亡金者訟攘金人蓋以二百金賄公公嚴拒不納同事生潛誘取之而亡金者坐誣後亡金者得直事發覺同事生皆坐法公獨不污登甲時蓋有當道知公者或謂通名可得吉士公不通名當彬竊柄時蓋諸司皆以賂贖彬公不賂贖慷慨任事凡所爲蓋時所深避而不肯爲者云生成化三年卒嘉靖十七年年七十有二

都察院右副都御史恭惠范公鏞傳略

鄒志

范鏞鞏昌衛人系出文正公後成化二十二年舉鄉
魁弘治六年成進士授中書舍人選湖廣道監察御
史鯁直敢言不避權倖因忤旨下錦衣衛獄旋得釋
補浙江按察司僉事歷四川按察司副使浙江布政
司右叅政浙江按察使所在釐奸起廢約已愛民而
民亦戴爲慈母畏爲神君尋陞南京操江右僉都御
史巡撫雲南右副都御史時中涓逆瑾用事兵部尚
書王瓊附之公秉直嫉邪動與瓊左瓊中之因降湖
廣布政司右叅議卒于官公生平大節不與時俗浮

沉遇事直言權倖憚之然亦以是逮獄謫官後瑾黨
被收中外交章表揚之詔復原官賜葬祭得蔭子謚
恭惠焉文正公在宋徯徯風節震耀千古幾百年後
而其孫鏞亦能世守善緗爲霜臺赤幟至甘心鼎鑊
彈射權奸抑何壯也詔謚恭惠洵不負爲文正之裔
矣

嘉議大夫都察院右副都御史巡撫山東沈公

林墓志銘

王鏊

公諱林字材美沈氏世爲蘇之長洲人曾大父謚大
父洪考傑封奉直大夫西州知州母張氏封宜人公
少好學成化甲午舉應天鄉試辛丑進士第時方重
內輕外或謂公有倖門可得內除公不從出知晉州
州人情而窳公教之樹藝蓄積修城垣興學校民間
利害以次罷行州之人皆欣然曰小沈吾父母也時
年未三十故云弘治己酉進南京刑部員外郎中出
知四川順慶府始至庭叅鎮守鎮守驕蹇不爲禮公

一拜而起鎮守怒曰一拜禮乎公曰若不以禮自處
安能以禮責人不顧而出巡行二州八邑之間覓觀
風土詢求民瘼俗喜告訐株聯蔓引動至百人公一
見立決無所牽引人甚便之郡學湫隘文廟列堂之
右撤而遷之建御書樓增置黌舍齋廬庖庫祭器又
增樂舞生教以聲容舞蹈之節暇則親臨程試講解
惓惓無倦士子皆奮文獻遂爲諸郡甲郡故無城郭
乃鑿西山之石仍溝洫物土方度高卑厚薄俄遷雲
南叅政後守因成之及蜀寇藍廖倡亂所過殘破屢
至順慶不能入遠近來依保障民益思之至雲南交

人忽躍兵境上遠近惟攘公曰吾在此無恐吾請以
身當之已而訖無事正德丁卯入賀 聖節時逆瑾
盜政內外官守罔不叅謁公固不往瑾嫌之銓曹屢
上公政不報最後擬山西布政命甫下瑾已遣邏卒
訶公公行遇之途抗手而過至撫拾無所得獨以沿
途乘傳白瑾有巧文義者適在傍曰沈良吏也文義
益未嘗識公而聞公名瑾爲免逮繫下巡按御史問
狀家人思禍不測規以賄免御史亦故緩其獄使得
爲計公曰無庸隳官祿與隳名節孰重竟落職爲民
罰米輸大同又輸沿途備直怡然以歸逆瑾伏誅言

者奏起公爲廣西布政使單車就道一如雲南之治
近世有所謂公堂錢者多出賦稅之羨名曰公堂盡
歸私篋雖號良有司亦然公一無所染凡修葺廨宇
立坊牌則取之又以其餘鎔範杯斝之屬爲公府宴
饗用時撫巡交章剡薦遂進都察院右副都御史巡
撫貴州兼理軍務時鎮筸銅仁烏羅等苗屢出劫掠
爲患前撫臣率以化外羈縻不究切之公曰是不一
揃刈且滋蔓蔓難圖也率勵將士爲深入計預給旗
牌招徠安輯諸寨皆歸附天生厓圍恃險攻之藺石
壽矢交下人莫敢嚮邇公調兵先截其餉道賊已困
火鎗飛礮繼之賊大窘奔竄俘其衆千餘牛羊器械
無筭陳家孟溪九十七寨相率來歸給以流官悉隸
貴前二衛庶革土官貪殘積弊自是內境晏然初藍
廖二寇橫行蜀中數年朝廷大發兵剪之公思奔迸
隣境爲患分兵守諸要害蜀寇盪平有犄角之助焉
癸酉聞奉直公計乞歸守制朝廷遣官諭祭比服闋
詔起巡撫山東公在費用兵勞勩成疾繼以哀毀在
途病加劇遂固乞致仕詔命馳驛以歸歸四年辛巳
卒春秋六十有九公生而端靜在衆中默然若不能
言而栗然穆然之色人望而知其爲君子也筮仕之

之初吳文定公亟稱爲處子之秀今少師楊公每言
昔在太學爲同舍生見公終日手一卷諸生誼關其
傍若罔聞也順慶之治有遺愛於蜀蜀人至今思之
不忘初順慶民相率立公生祠憲副楊錦至郡以書
來曰公何修而得此於蜀人盧御史師名行縣父老
請公祠在學官出入爲艱請遷便近許之他日復至
則已輪奐奐然盧訝其成之速知其得民之深也題
詩歎息而去及家居日焚香端坐不以事經心事二
親依依不忍去左右雖燕處未嘗敢南向坐初歸自
蜀弟麓已別居公亟過之出曰吾寡兄弟忍別異
耶待族屬鄉黨皆有恩義於

嘉議大夫都察院右副都御史孚齋伍公符墓

志銘

張時徹

公諱符字朝信別號孚齋始祖醇福州長史目閩之
寧化徙于安福遂占籍焉五世祖洪以春秋登國朝
首科進士知上元縣死繼母難李忠文公爲作死孝
傳高祖綸生子冕舉于鄉知樂清縣贈河南道監察
御史冕子麟封刑部員外郎麟子希淵號拙菴則公
父也會試舉春秋第一累官右布政使祀于廣之名
宦祠母劉氏累贈夫人公生之前夕刑部公夢有達
官至其家心異之稍長教之春秋輒名馳藝林年十

九母夫人卒于廣州匍匐歸其喪成化癸卯鄉試亦
舉春秋第一丁未賜費文憲公榜進士選入翰林讀
秘閣書學士汪公傳公每月試亟稱爲奇才云會有
忌者竟授刑部主事而大司寇屠公寔器之命典司
章奏法比精詳諸司式焉轉員外郎會嘉興寧波並
缺守司寇公欲爲嘉興得之乃冢宰屠公曰我方秉
銓而不能得一賢守乎竟以補寧波到郡卽以古循
吏自效兢兢禮法自公庭以至屬邑莫不整整時有
監生袁孟恪壻於顯貴以貲豪里閭殺人無忌又有
楊大王者怙勢橫暴吞噬細弱官司莫敢何問公皆
捕而法之豪右斂跡闔郡快焉篤意黌校課諸生講
習資以膏新每督學官至程品優劣無爽於公素所
獎拔如聞公淵輩爲時名卿他如均徭役治水利減
筵宴戒戲劇禱雨而澍應禳災而疫息察富民之詐
領賑銀訊黠盜之夜竊耕犢益矯矯章卓矣會當考
察科道疏舉天下知府一十七人而公爲首嘗歲侵
民不聊生令民得下海網捕爲活海道以令不自己
也而怒之嗾巡按劾逮郡士民七千餘人連名赴闕
疏太守爲民得罪之故 孝皇躡而釋之反坐言者
乙丑九載考績擢浙江左叅政風動列郡小大吏稟

受令約惟謹已已轉雲南右布政使到任甫三月而
逆瑾以宿憾傾之繫繫園棘理敗乃免歸侍拙菴公
養志引恬懽如也辛未起湖廣右布政使會拙菴公
邁疾卒哀毀骨立服闋未起銓部輒補四川右布政
使蜀值兵戈之後百計撫綏會松潘寇警督餉著勞
捷聞賜白金綵幣以旌乙亥陞福建左布政使丙子
入覲銓部考天下方面官獨與張公時峻最焉戊寅
陞南京光祿寺卿濱行豪軍假以缺糧倡亂時代事
者半月矣會鎮守市舶兩內臣與休罷副使高文達
皆不禮於公黨而肆整適錢寧竊柄逮捕詔獄旣而
得白閩人謂有天云先是內閣礪菴毛公私於家宰
陸公謂光祿之擢不滿人望奏改山東巡撫未及赴
而有亂軍之事已乃補直隸巡撫甫持節適 武皇
南巡細鉅畢辦 上嘉悅舉御觴觴之武將劉暉宦
官張忠竝以寵倖前驅竊弄威福正色與抗卒莫之
逞畿輔要衝王師絡繹民心凜凜多方鎮定而六郡
三關晏然安堵 駕旋僅拜銀牌之賜不阿左右故
也連疏乞休俱溫旨慰畱 今上御極懇乞骸骨凡
五疏始得允年六十三卒

屬後錄

卷之六十一

五十九



